



ЎЗБЕКИСТОН  
ҲАЛ

PDF

УБЛИКАСИ НОМИДАН  
У В Қ А Р О Р И

Бекобод тумани

Бекобод туманлараро иқтисодий судининг судьяси И.Қурбанов раислигида, Р.Турсинбаеванинг котибалигида, [REDACTED] вакили [REDACTED] (28.03.2022 йилдаги 23-02427-сонли ишончномага асосан) иштирокида аризачи [REDACTED] жавобгар [REDACTED] банклардаги ҳисобварақлар бўйича операцияларни тўхтатиб туриш тўғрисидаги аризаси юзасидан қўзғатилган иқтисодий ишни очиқ сайёр суд мажлисида кўриб чиқиб, қуйидагиларни

**а н и қ л а д и:**

аризачи [REDACTED] (бундан буён матнда “аризачи” деб юритилади) судга ариза билан мурожаат қилиб, жавобгар [REDACTED] (бундан буён матнда “жавобгар” деб юритилади) банклардаги ҳисобварақлар бўйича операцияларни тўхтатиб туришни сўраган.

Суд мажлисида иштирок этган аризачи вакили аризадаги асосларни таъкидлаб, жавобгар 2021 йил ноябрь учун Жисмоний шахслар даромадидан олинадиган солиқ бўйича солиқ ҳисоботини белгиланган муддатда тақдим этмаганлигини билдириб, аризани қаноатлантиришни сўради.

Жавобгар суд муҳокамасининг вақти ва жойи тўғрисида тегишли тарзда хабардор қилинган бўлса-да, бугунги суд мажлисида вакили иштирокини таъминламади.

Ўзбекистон Республикаси Иқтисодий процессуал кодексининг 170-моддаси учинчи қисмига мувофиқ, иш муҳокамасининг вақти ва жойи тўғрисида тегишли тартибда хабардор қилинган жавобгар, учинчи шахслар суд мажлисига келмаса, низо уларнинг йўқлигида ҳал қилиниши мумкин.

Мазкур ҳолатда суд ишни жавобгар вакилининг иштирокисиз кўришни лозим деб топади.

Суд иш ҳужжатларини ўрганиб, аризачи вакилининг кўрсатмаларини тинглаб, қуйидаги асосларга кўра аризани қаноатлантиришни лозим топди.

Иш ҳужжатларидан кўринишича, жавобгар томонидан 2021 йил ноябрь учун Жисмоний шахслар даромадидан олинадиган солиқ бўйича солиқ ҳисоботини 2022 йил 18 март кунига қадар тақдим этилмаган.

Ваҳоланки, Ўзбекистон Республикаси Солиқ кодекси (бундан буён матнда “СК” деб юритилади) 389-моддасининг биринчи қисмига кўра солиқ тўловчилар, солиқ раври тугаганидан кейин ўттиз кун ичида - солиқ органларига тўлов манбаидан солиқ солилмаган моддий наф тарзида даромадлар олган жисмоний шахслар тўғрисида Ўзбекистон Республикаси Давлат солиқ қўмитаси томонидан Ўзбекистон Республикаси Молия вазирлиги билан келишилган тасдиқланадиган шаклдаги маълумотномани ҳамда ҳар ойда, даврдан кейинги ойнинг ўн бешинчи кунидан кечиктирмай, йил бўйича эса - йиллик молиявий ҳисоботни тақдим этиш муддатида ҳисобланган ва ҳақиқатда тўланган даромадлар суммалари ҳамда ушлаб қолинган солиқнинг суммалари тўғрисидаги ҳисоботларни тақдим этишлари шарт.

Аризачи солиқ ҳисоботини тақдим этиш юзасидан жавобгарнинг шахсий кабинетига 2022 йил 2 февраль ва 2022 йил 4 февраль куни электрон шаклда хабарнома юборган. Бироқ, жавобгар ушбу хабарномани қабул қилиб олган бўлса-да, солиқ ҳисоботларини белгиланган муддатда тақдим этмаган.

СК 111-моддасининг биринчи қисмига кўра солиқ тўловчининг (солиқ агентининг) банкдаги ҳисобварақлари бўйича операцияларни тўхтатиб туриш тўғрисидаги қарор солиқ органининг раҳбари (раҳбар ўринбосари) томонидан ўн кундан кўп бўлмаган муддатга қабул қилиниши мумкин. Солиқ тўловчининг (солиқ агентининг) банкдаги ҳисобварақлари бўйича операцияларни ўн кундан кўп муддатга тўхтатиб туриш тўғрисидаги қарор солиқ органининг илтимосномасига асосан суд томонидан қабул қилиниши мумкин. Бунда солиқ тўловчининг (солиқ агентининг) банк ҳисобварақлари бўйича операциялари суд томонидан қарор қабул қилингунга қадар тўхтатиб турилади.

Шунингдек, ушбу модда учинчи қисмининг 1-бандига кўра юридик шахслар ва якка тартибдаги тадбиркорларнинг банкдаги ҳисобварақлари бўйича операцияларни тўхтатиб туриш солиқ органи томонидан мазкур солиқ тўловчиларнинг (солиқ агентларининг) солиқ мажбуриятлари бажарилишини таъминлаш учун ушбу солиқ тўловчи (солиқ агенти) томонидан солиқ органига молиявий ва (ёки) солиқ ҳисоботи бундай ҳисоботни тақдим этишнинг белгиланган муддати тугаганидан кейин ўн кун ичида тақдим этилмаганда қўлланилиши мумкин.

Мазкур ҳолатда жавобгар [REDACTED] томонидан Жисмоний шахслар даромадидан олинадиган солиқ бўйича солиқ ҳисоботлари белгиланган муддатларда тақдим этилмаганлиги аризачи вакилининг судга тақдим этган маълумотномаси, кўрсатмаси ҳамда иш ҳужжатлари билан тўлиқ тасдиқланади.

Ўзбекистон Республикаси Иқтисодий процессуал кодекси 118-моддасининг биринчи қисмига кўра суд харажатлари ишда иштирок этувчи шахсларнинг қаноатлантирилган даъво талаблари миқдорига мутаносиб равишда уларнинг зиммасига юклатилади.

Қайд этилганларга кўра суд, ишнинг барча ҳолатларини ҳар томонлама, тўлиқ ўрганиб чиқиб, аризани қаноатлантиришни, “Давлат божи тўғрисида”ги Ўзбекистон Республикаси Қонуни 9-моддаси биринчи қисмининг 19-бандига асосан аризачи ва жавобгар - ҳуқуқий таъсир чораларини қўллаш тўғрисидаги

ишлар бўйича давлат божи тўлашдан озод этилганлигини инобатга олиб, иш бўйича давлат божини ундирмасликни, почта харажатларини жавобгардан ундиришни лозим топди.

Юқоридагилардан келиб чиқиб, Ўзбекистон Республикаси Иқтисодий процессуал кодексининг 118, 179 ва 222-моддаларини қўллаб, суд

қ а р о р и қ и л а д и:

Аризачининг талаби қаноатлантирилсин.

Жавобгар

банклардаги барча ҳисобварақлари бўйича барча чиқим операциялари тўхтатилсин.

Солиқ тўловчининг (солиқ агентининг) банкдаги ҳисобварақ бўйича операцияларнинг тўхтатиб турилиши фуқаролик қонун ҳужжатларига мувофиқ биринчи навбатда кўрсатилган тўловларга, шунингдек қонун ҳужжатларига мувофиқ ундирувга йўл қўйилмайдиган банклардаги ҳисобварақларга татбиқ этилмайди.

Жавобгар

ҳисобидан Ўзбекистон Республикаси Олий судининг депозит ҳисоб рақамига 21 600 сўм почта харажати ундирилсин.

“Давлат божи тўғрисида”ги Ўзбекистон Республикаси Қонуни 9-моддасининг 19-бандига кўра аризачи ва жавобгар - ҳуқуқий таъсир чораларини қўллаш тўғрисидаги ишлар бўйича давлат божидан озод этилганлигини инобатга олинсин.

Ҳал қилув қарори ўн кунлик муддат ўтгач қонуний кучга киради.

Ҳал қилув қарори қонуний кучга киргач почта харажатини ундириш бўйича ижро варақаси берилсин.

Мазкур ҳал қилув қароридан норози тараф шу суд орқали Тошкент вилоят судининг Иқтисодий ишлар бўйича судлов ҳайъатига ўн кунлик муддат ичида апелляция шикояти бериши мумкин.

**Раислик қилувчи, судья**

**И.Қурбанов**